

駢

體

文

鈔

駢體文鈔卷二

頌類

揚子雲趙充國頌

明靈惟宣戎有先零先零猖狂侵漢西疆漢命虎臣惟後
將軍整我六師是討是震旣臨其域諭以威德有守矜功
謂之弗克請奮其旅於罕之羌天子命我從之鮮陽營平
守節屢奏封章料敵制勝威謀靡亢遂克西戎還師於京
鬼方賓服罔有不庭昔周之宣有方有虎詩人歌功乃列
於雅在漢中興充國作武赳赳桓桓亦紹厥緒
史孝山出師頌

薄於子雲勁于中郎

茫茫上天降祚有漢兆基開業人神攸贊五曜霄映素靈
夜歎皇運來授萬寶增煥厯紀十六天命中易西零不順
東夷構逆乃命上將授以雄戟桓桓上將實天所啟允文

允武明詩說禮憲章百揆爲世作楷昔在孟津惟師尙父
素旄一麾渾一區宇蒼生更始朔風變楚薄伐獫狁至於
太原詩人歌之猶歎其艱况我將軍窮城極邊鼓無停響
旗不斂褰澤霑遐荒功銘鼎鉉我出我師于彼西疆天子
餞我輅車乘黃言念伯舅恩深渭陽介珪旣削列壤酬勳
令我將軍啟土上郡傳子傳孫顯顯令問

班孟堅寶車騎北伐頌

但頌車騎之功而不歸美命將之人殊失立言之體宜
昭明不之錄也然其詞奧美且可以備頌之別格

車騎將軍應昭明之上德該文武之妙姿蹈佐歷握輔榮
翼肱聖上作主光輝資天心謨神明規卓遠圖幽冥親率
戎士巡撫疆城勒邊御之永設奮輶櫓之遠徑閱遐黎之
騷狄念荒服之不庭乃總三選簡虎校勒部隊明誓號援

謀夫於末言察武毅於俎豆取可杖於品象拔所用於仄
陋料資器使采用先務民儀響慕羣英影附光戎相率東
胡爭驚不召而集未令而諭於是雷震九原電曜高闕金
光鏡野武旗響蛻衝雞鹿超黃磧輕選四縱所從莫敵馳
颺疾踵蹊迹探梗莽採嶰阨斷溫禺分尸逐電激私渠星
流霰落名王交手稽顙請服乃收其鋒鏃干鹵甲冑積象
如邱阜陳閱滿廣野載載連百兩散數累萬億放獲驅孥
揣城拔邑擒馘之倡九谷謠譟響聒東夷埃塵戎域然而
唱呼鬱憤未逞厥願甘平原之酣戰矜訊捷之累算何則
上將崇至仁行凱易宏濃恩降溫澤同庖廚之珍饌分裂
室之織帛勞不御輿寒不施釋行無偏勤止無兼役性蒙
識而愜戾順二者異而懦夫奮遂踰涿郡跨祁連籍庭蹈
就疆獨靖嶮嶮嶺幽山趨凶河臨安候軼焉居與虞衍顧衛

霍之遺迹職伊秩之所邈師橫驚而庶御士拂懼以爭先
回萬里而風騰劉殘寇於沂垠糧不賦而師贍役不重而
備軍行戎醜以禮教斫鴻校而昭仁文武炳其竝隆威德
兼而兩信清乾鈞之攸冒拓畿畧之所順橐弓鏃而戢戈
回雙麾以東運於是封燕然以隆高禴廣鞬以宏曠銘靈
陶以勒崇欽皇祇之祐貺宣惠氣盪殘風軻秦幽嘉凝陰
飛雪灑庶其雨洒淋榛枯一握興有說脫不嘉卉始濃土可句讀
膏含養四行分任於是三軍稱曰疊疊將軍克廣德心光
光神武宏昭德音超兮眇天潛眇兮與神參
摯仲洽太康頌晉書虞翻太子舍人除聞喜令時天子留
心正道吳寇初平上太康頌以美晉德
此專爲平吳而作詞有限斷故不爲空綺

於休上古人之資始四隩咸宅萬國同軌有漢不競喪亂
靡紀畿服外叛侯衛內圯天難旣降時惟鞠凶龍戰虎爭

分裂遐邦備僭岷蜀度逆海東權乃緣間割據三江明明
上帝臨下有赫乃宣皇威致天之辟奮武邇隧罪人斯獲
撫定朝鮮奄征韓貊文旣應期席卷梁益元愍委命九夷
重譯叩冉哀牢是焉底績我皇之登二國旣平靡適不懷
以育羣生吳乃負固放命南冥聲教未暨弗及王靈皇震
其威赫如雷霆截彼江沔荆舒以清邈矣聖皇參乾兩離
陶化以正取亂以奇耀武六旬興徒不疲飲至數實干旄
無虧洋洋四海率禮和樂穆穆宮廟歌雍詠錄光天之下
莫匪帝畧窮髮反景承正受朔龍馬駉駉風于華陽弓矢
橐服干戈戢藏嚴嚴南金業業餘皇雄劔班朝造舟爲梁
聖明有造實代天工天地不違黎元時邕三務斯協用底
厥庸旣遠其迹將明其蹤喬山惟嶽望帝之封猗歟聖帝
胡不封哉

宋二語如綴效封禪
文而不得其理也

潘正叔釋奠頌

有序

有典有則義兼箴誨異乎鋪張之詞

元康元年冬十二月上以皇太子富於春秋而人道之始莫先於孝悌初命講孝經於崇政殿實應天縱生知之量微言奧義發自聖問業終而體達至三年春閏月將有事於上庠釋奠於先師禮也越二十四日景申侍祠者既齊興駕次於太學太傅在前少傅在後恂恂乎宏保訓之道宮臣畢從三率備衛濟濟乎肅翼贊之敬乃掃壇爲殿懸幕爲宮夫子位於西序顏回侍於北墉宗伯掌禮司儀辨位二學儒官搢紳先生之徒垂纓佩玉規行矩步者皆端委而陪於堂下以待執事之命設樽簋於兩楹之間陳罍洗於阼階之左几筵旣布鐘懸旣列我后乃躬拜俯之勤資在三之義謙光之美彌劭闕里之教克崇穆穆焉邕邕

焉真先王之微典不刊之美業允不可替已於是牲饋之事既終享獻之禮已畢釋元衣御春服弛齋禁反故式天子乃命內外羣司百辟卿士蕃王三事至於學徒國子咸來觀禮我后皆延而與之燕金石簫管之音八佾六代之舞鏗鏘闐闐般辟俛仰可以激神滌欲移風易俗者罔不畢奏抑淫哇屏鄭衛遠佞邪釋巧辯是日也人無愚智路無遠邇離鄉越國扶老攜幼不期而俱萃皆延頸以視傾耳以聽希道慕業洗心革志想洙泗之風歌來蘇之惠然後知居室之善著應乎千里之外不言之化洋溢於九有之內於熙乎若典固皇代之壯觀萬載之一會也尼昔忝禮官嘗聞俎豆今厠末列親覩盛美激漬微猷沐浴芳潤不知手舞口詠竊作頌一篇義近辭陋不足測聖德之形容光聖明之遐度其辭曰

二元迭運五德代徽黃精既亢素靈乃暉有皇承天造我
晉畿祚以大寶登以龍飛宣基誕命景熙遐緒三分自文
受終惟武席卷要蠻蕩定荒阻道濟羣生化流率土後帝
承式丕隆曾構奄有萬方光宅宇宙篤生上嗣繼期挺秀
聖敬日躋濬哲閎茂留精儒術敦閱古訓遵道讓齒降心
下問鋪以金聲光以玉潤如日之升如乾之運乃延台保
乃命學臣聖容穆穆侍講閭闔抽演微言啓發道真探幽
窮蹟溫故知新講業既終精義既研崇聖重師卜日告奠
陳其三牢引其四縣旣戒旣式乃盥乃薦恂恂孔聖百王
攸希亶亶顏生好學無違曰皇儲后體神合機兆吉先見
知來洞微濟濟二宮藹藹庶寮俊乂鱗萃髦士盈朝如彼
和肆莫匪瓊瑤如彼儀鳳樂我雲韶瓊瑤誰剖四門洞開
雲韶奚樂神人允諧蟬冕耀庭細佩振階德以謙光仁以

恩懷我酒惟清我有惟馨舞以六代歌以九成莘莘胄子
祁祁學生洗心自百觀國之榮學猶蒔苗化若偃草博我
以文宏我以道萬邦蟬蛻矧乃俊造鑽蚌瑩珠剖石擿藻
絲匪元黃水罔方圓引之斯流染之斯鮮若金受範若埴
在甄上好如雲下效如川昔在周興王化之始曰文曰武
時惟世子今我皇儲濟聖通理緝熙重光於穆不已於穆
伊何思文哲后媚茲一人實副元首孝治家邦光照九有
純嘏自晉永世昌阜微微下臣過充近侍猥躡風雲鸞龍
是厠身藻芳流目玩盛事竭誠作頌祗詠聖志

鮑明遠河清頌

大抵華腴害骨然明遠采壯簡文思清固一時之傑也
臣聞善談天者必徵象於人工言古者先考績於今鴻儀
以降遐哉邇乎鏤山岳雕篆素昭德垂勳可謂多矣而史

編唐堯之功載格于上下樂登文王之操稱於昭于天素
狐元玉聿彰符命朴牛文螭爰定祥厯魚鳥動色禾雉興
讓皆物不盈皆而美溢金石頌聲爲之而寢詩人于是不
作庸非惑與自我皇宋之承天命也仰符龍木之精俯協
龜水之靈君圖帝寶粲爛瑰英固業光曩代事華前德矣
聖上天飛踐極迄茲二十四載道化周流元澤汪濊地平
天成上下含熙文同軌通表裏禔福耀德中區黎庶知讓
觀英遐表夷貉懷惠秩禮恤勤散露臺之金振民舒國傾
御邸之粟約違迫脅奢去甚泰燕無留飲畋不槃樂物色
異人優游鯁直顯靡失心幽無怨魄精照日月事洞天情
故不勞仗斧之使號令不肅而自嚴無尋鳳舉之事靈怪
不召而自彰萬里神行踐塵不起農商野廬邊城偃柝冀
馬南金填委內府馴象栖爵充羅外苑阿紈纂組之撓衣

覆宗國魚鹽杞梓之利傍瞻荒遐士民殷富繁溢五陵宮
宇宏麗崇冠三川閭閻有盈歌吹無絕朱輪輦轍華冕重
肩豈徒世無窮人民獲休息朝呼韓罷酤鐵而已哉是以
嘉祥累仍福應尤盛青丘之狐丹穴之鳥栖阿閣遊禁園
金芝九莖木禾六秀銅池發膏畝腴宜以謁薦郊廟和協
律呂烟霏霧集不可勝紀然而聖上猶夙興昧旦若有望
而未至閔規遠圖如有追而莫及神明之貺推而弗居也
是以琬碑鏤檢盛典蕪而不治朝神省方大化抑而未許
崇文協力之士蘊儼頌於外坐朝陪宴之臣懷掄揚于內
三靈佇睠九壤注心既有日矣歲宮乾維月纏蒼陸長河
巨濟異源同清澄波萬壑潔瀾千古斯誠曠世偉觀昭啓
皇明者也語曰影從表瑞從德此其效焉宣尼稱鳳鳥不
至河不出圖傳曰俟河之清人壽幾何皆傷其不可見也

然則古人所不見者今殫見之矣孟軻曰千載一聖是旦
暮也豈不信哉夫四皇六帝樹聲長世大寶也澤浸羣生
國富刑清鴻德也制禮裁樂惇風裁俗文教也殊華逋羯
束頽象闕武功也鳴禽躍魚滌穢河渠至祥也大寶鴻德
文教武功其崇如此幽明協贊民祇與能厥應如彼惟天
爲大堯寶則之皇哉唐哉疇與爲讓抑又聞之勢之所覃
者淺則美之所傳者近道之所感者深則慶之所流者遠
是以豐功邁命潤色滕策盛德形容藻被歌頌察之上代
則奚斯吉甫之徒鳴玉鸞於前視之中古則相如王褒之
屬施金羈于後絕景揚光清埃繼路班固稱漢成之世奏
御者千餘篇文章之盛與三代同風由是言之斯廼臣
子舊職國家通義不可輟也臣雖不敏寧不勉乎乃作頌
曰

窺刊崩石摺逸殘竹巢風寂寥義埃綿邈鉅生大年瞻學
淵聞鑿繡成景粉纈額軒徒翫井科未覩天河亘古通今
明鮮晦多千齡一見書史登歌旋我皇駕揆景方塗淩周
躡殷蹶唐轍虞如彼七緯累壁重珠高祖撥亂首物定靈
更開天地再鑄羣生虎御三傑龍步八垠朔南暨教海北
騰聲淪深格高浹遐洞冥幾鼎遷宋元圭告成大明方徽
鴻光中微聖命誰堪皇厯攸歸謀從筮協神與民推黃旗
西映紫蓋東輝納瑞螭玉升政衡機金輪豹飾珠冕龍衣
正位北辰垂拱南面天下何思日用罔倦復禮歸仁觀恒
通變一物有違戚言毀膳菲躬簡法厚下安宅謙德彌光
損道滋益孝崇饗祀勤隆耕籍饘酎秋羊封瑾春酪嬰毫
兼梁鰥孤重帛體由學染俗以教遷禮導刑清樂化風宣
分衢讓齒折訟推田野旌伏彥朝賞登賢儒訓優柔武節

森鷲文憲精宏戎容犀利樞鈴明審程護周備吏礪平端
民羞幸覲桴鼓凝埃烽驛垂轡銷我長劒歸爲農器閩外
水鄉鄣表炎國隴首西南渤尾東北艷艷嶺丹渾渾泉黑
移琛雲棧轉隼印焚狼歌薦功鳥譚陳德治博化光民阜
財盛班白行謠青綺高詠雲表幽和物章明慶麗植雕質
蠡行藻性仁草晨孳德宿宵映海無隱巖山有黃落牛羊
內首閭戶外拓端木朋生祥禽輩作薰風蕩閨飴露流閣
器範神妙劑調象勺匪直也斯偉慶方臻注彼四瀆媚比
雙川伏靈遙紀闕貺遐年澄波海嶽鏡流蕊山泉室凝澱
水府清涓俛瞰夷都降眦驪淵朱宮潛耀紫閣陰鮮昔在
夷德王風不昌廼溢廼竭或壅或亡潔源濫壑曾是未央
先民永慨大道悠長云何其瑞實鍾我皇聞諸師說天竦
聽密介焉如響匪遠匪疾矧是皇心妙夫貞一左右天經

戶牖人術訐謨布簡絲言盈室歲有綿祀清豈崇日一人
之慶吹萬稟和靈根方固修源重波副睿貳哲帝體皇柯
景雲蔚嶽秀星駢羅垂光九野騰響四遐輔居鼎足槃石
虎牙世匹周室基永漢家泰階旣平洪河旣清大人在上
區宇文明樵夫議道漁父濯纓臣照作頌鋪德樹聲

梁簡文帝大法頌

并序

大法馬寶題皆不經而文之華腴不下顏鮑且裁章宅
句彌近彌平斯固後來所取法故亦不能闕焉

皇帝以湛然法身不捨本誓神力示現降應茲土龍顏日
角參漏重瞳衡表連珠文爲玉斗自納麓開基天地之德
已布封唐啓跡日月之照先明百揆之序方舜九河之導
均禹尚宏事殷之禮且屈在田之則自五鼎朝飛告赤文
之瑞其雨七日受綠色之符神器有歸鼎運斯集焦門厭

棄德之君鮪水發白旄之陣然後受皇天之睨命當四海
之樂推豈假祀蚩尤於沛庭託河冰於王霸於時鳳凰裂
序蒼赤外度乃選五石以補之坤軸傾斜積水發圻乃緯
九藪而正之陰兔兩重陽鳥三足乃定王業以暉之攝提
乖方孟陬失紀乃置清臺以辨之維冠冕於己頽綴珩珮
於旣毀自憑玉几握天鏡履璿璣而端拱居巖廊而淵默
於今三十有二載也是以天德一於上地數二於下復朗
參辰不易日月兩曜如合璧五精如連珠禋宗類吳虔丘
禮澤敬行五祀功被百神川嶽呈祥風煙效祉青雲千呂
黃氣出翼聽喻山之威鳳製大夏之貞筠陽管叶春雌鍾
應律上林之課匪疎柏府之占無謬奏六英於若水張咸
池於洞庭秉翟動和天之樂建華宣易俗之奏協律有渢
渢之序典樂致雍雍之節詩書乃陳緇縹斯備蒲輪受伏

生之誦科斗薦魯宅之文蒸栗殺青玉牒石記填委廣內
暉煥麒麟置台命袞法河依嶽建職樹司區雲祥火高山
容與赤散邈迤色麗文翬章研織鳥諫鼓高懸芻言不棄
肺石通惋書謗橋板草名指佞便辟去朝獸稱觸罪姦回
放黜是以龍翔鳳集河濂海澆露下若飴泉浮如醴桂薪
不斧而丹甌自熟玉臯詎率而銀甕斯滿河光似霧樹彩
成車氛氲四照暉麗五色神明磊砢徵祥布濩金鱗鐵面
貢碧砮之睪航海梯山奉白環之使戴日戴斗靡不來王
太平太蒙無思不服方叔召虎之臣均輦應鼓之將秉龍
虎之秘韜握朱元之異器受脤於廟堂之上揚威於關塞
之下出玉門而直指度金城而奏策蕩雜種之殘妖匡中
原之塗炭北臨地脉西出天渠昆夷罷患夙沙自服獲犬
戎之鹿縣密須之鼓藁街有受纓之虜詔水觀受降之首

四表無塵六合共貫皇德隆矣太平之風浹乎無外矣天子內韜無生之至慧外應體乾之宏跡將欲改權教示實道遺方便之說導化城之迷乃端展神居吁而言曰若夫眇夢華胥怡然姑射服齊宮於元扈想至治於汾陽輕九鼎於褰裳視萬乘如脫屣斯蓋示至公之要道未臻於出世也至於藏金玉於川岫棄琴瑟乎大壑卑躬菲食茨堂土階彤車非巧鹿裘靡飾斯蓋示物以儉亦未階於出世也解網放禽寄泉掩薊起泣辜之澤行扇暘之慈推溝之念有如不足納隍之心無忘宿寤蓋所以示物以爲仁亦未階乎出世也紫府青丘陁山漳水敦河上之道文悅岐伯之章句甘泉啓太一之壇嵩山置奉高之邑碣石刻羨門之誓不期作交門之歌斯蓋止愛久齡事在諸已篤而爲論彌有未宏雖獲龍從之禪終墮長生之難徒階三清

之樂不祗入倒之境豈若燃智慧之炬照生死之闇出五
陰之聚升六度之舟浮衆德之海踐不生之岸於是莊嚴
國界建立道場廣行利益開闡佛事驅彼衆生同躋仁壽
引茲具縛俱入大乘九有傾心十方草靡如憑津濟咸賴
歸依曄乎若朝日之開衆華霈乎若農夫之遇膏雨功德
之翼已圓智慧之門必備以爲般若經者方等大法峻極
靡際深邃無底籠萬善乎無相兆四垓而無邊譬猶枝川
派別入大海而同味衆芳雜彩到須彌而一色空空不著
如如俱會不合不散無去無來種覺可生允茲佛母羣典
弗逮是號經王乃欲震一音雨法雨示五眼引重昏昭暘
紀歲元枵次星夾鍾應乎仲春甲申在乎吉日將幸同泰
大轉法輪茲寺者我皇之所建立改大理之署成伽藍之
所化鐵繩爲金沼變鐵網爲香城照神光於熱沙起清涼

於炎火千櫟截嶺百拱穹窿紅壁元梁華櫬玉砌三階齊
列四注周流上玉翼而捫天飛銀楹而蔽景虹拖蜿蜒承
幾繞霽蓮抽井倒冒宇臨窗彤彤寶塔旣等法華之座我
我長表更同意樂之國下鑿白銀之塹傍暉金薄之甃高
門洞啓不因銅馬之飾寶殿霞開無假鳳皇之瑞金輪燭
日妙臨淄之地下層臺累駕邁宛委之空飛夏宇凝霜溫
室含煖雕樓之內滴動而響生洞扉之裏鷦歸而氣激幢
號摩尼旛懸金縷盤徑十丈鈴圍四斛舒七寶之交枝流
入功之淨水地芝候月天華逆風法鼓夜鳴聲中聞法瓊
枝旦動葉裏成音妙德陽之宮麗未央之闕故銅欄三丈
追噓井幹玉樓十二遙恥神仙譬彼清涼之臺同符蘭臺
之寺忉利照園之東帝釋天城之北故以辛壬癸甲綿蠻
霍黼吁哉其不可狀鏘鏘吁吁瓊瑤雜錯邈乎其不可名

於是壁日揚精景雲麗色薰風徐動淵露微垂後距屯威
前茆警列武較星連鴻鐘吐響運天官之法駕啓天路之
威神百靈扶持千乘雷動六虬齊軫七斗垂暉雲罕乘空
勾陳翼駕超光躡景日被天廻金蓋玉輦豹服鼉鼓纖驪
沃若天馬半漢綠弓黃弩象飾魚文飲飛案節不勞斬蛟
之劍虎賁弢羽豈假鳴烏之射湛湛奕奕麟麟赫赫出乎
大通之門天子降雕輦之貴行接畧之禮頂拜金山歸依
月面如聞萬歲之聲若觀六變之動於是乃披如來之衣
登獅子之座均百慮之紛總愍三請之懇懃啓眞慧之深
宗明度彼之宏教二諦現空有之津二智包權實之底大
乘豁其靡礙道心究其歸涯因果之躡不運而行眞俗莫
求弗動斯到不以二法會乎中道盡佛淵海入佛法藏極
修妬之妙典研龍宮之秘法宣娑婆之奧旨闡衆聖之微

言正水旣沾邪難自息慧日普照毒霜並消除黑闇於四
生遣無明於三界巍巍乎若彌樓之在巨海穆穆乎譬衆
星之繞圓月於時天龍八部側塞空界積衣成座散華至
膝三千化穢土之質火宅有離苦之期惡道蒙休泥犁普
息誅誅學侶濟濟名僧皆樂說如辯才智慧如身子踰乎
青目黑齒高彼廣膝赤髭咸符寫瓶之思竝沾染薨之施
如金復冶似玉更雕聞所未聞得未曾得鬱搖動色請益
無倦百司俱列簪履相趨豐豹焜煌華綬苒弱謂舍衛之
集大林之講無以過也將令一一佛性逢了因而俱出一
一佛土咸遣二而除三比夫歌南風尙黃老臨辟雍講孔
宅么麼安足而詔哉距於三月甲辰法席圓滿如來放大
光明現希有事雄雄吐色珠火非儔瞳瞳上映丹紫競發
榮河恥其祥潤汾陰陋其暉影掩入殿之紫雲奪鴻門之

妙氣昔法華初唱毫照普林般若肆宣通身盡笑王城之
瑞千載更逢豈非聖王同諸佛身降茲妙相等諸佛力有
若符契焉猶秉淵默之謙虛宏懷焉之至誠爲而不宰推
而勿居以百姓之心爲心非關諸已荷負無倦攝受四生
皇太子臣綱視膳東廂親承大法以爲西巡東狩讚頌以
興柴山望祀詠歌斯作况頂開而受露鞠躬而聞道敢述
盛德之形容以爲頌曰

玉牒悠負青史綿長道沿五勝風殊百王商丘命瑱姬水
開瓊河澄待聖海謚期皇方天譬地功歸有梁垂拱南面
克己巖廊權輿教義製造衣裳九華革響六樂改張儀鳳
婉婉擊石鏘鏘廣修璧水洞啓膠庠輕輶徵聘旌帛搜揚
蘭臺且富廣內斯藏芸香馥蘭綠字摘章文功旣被武跡
斯彰題雕臆鏤舌紫支黃南街請質北闕來王飛旌集翰

勒跡書狼銀車引附黑節招荒文同海截化普龍鄉西踰
月窟東漸扶桑卑宮類禹解網如湯衢室納異明臺引良
善旌弗卷諫鼓其鏜萬符集祉百神啓祥黑丹吐潤朱草
舒芳珠懷鏡像星含喜光液池下鶴高梧集鳳赤熊旦繞
素雉朝翔觀玉伯友訪道西王遊經建木巡指盛唐終非
運出豈曰津梁我有無礙共向圓常玉鑾徐動金輪曉莊
紫虬翼軼綠驥驤驤虎文駐蹕龍驂啓行闌干玉馬照曜
天狼元旄映日翠鳳晞暘前飛格澤後擁陸梁風移霆掃
參差焜煌峩峩寶座郁郁名香法徒學侶塵沙堵墻慈雲
吐澤法雨垂涼三密不限四辯難量猶茲海寶譬彼山王
慧流總被藥木開芒佛日出世同遣惑霜帝釋歌詠幽祇
讚揚空華競下天琴自張山含影色地入毫光非煙繞氣
陸藕開房澤普三界恩均八方巍巍堂堂爲舟爲航伊臣

稽首萬壽無疆

梁簡文帝南郊頌有序

臣聞惟天爲大聖人敬其德知幾其神至人契其道故龍
官弱言之后合揆於蒼昊鳥紀垂衣之君昭格於上帝莫
不巍巍乎穆穆乎渙汗於綠篇氛氲於丹冊者矣我梁皇
帝之御天下也乘燁祇之盛曜卽璧月之遐照等乾覆之
薰養合坤載之靈長四三六五之意十堯九舜之明名與
功偕業將時並自撥亂反正伐罪弔民馮玉几握金鏡君
臨萬國於今二十有二載也緯天維理地軸移澆風於末
俗反淳正於區中化不言而先顯教不嚴而已肅流樂復
雅遠符雲韶之世隆禮還章非因忠信之薄九垓同軌四
海無波儲明變照儀天作兩三袞咸作叶化台光麴蘖王
風鹽梅帝載塵清世晏蒼兕無用其武功運謐時平鵲鷺

咸修其文德桃林散甲華山弢及玉門罷候紫塞沉鋒屠
羊鈞壑之士厭洗耳而襲簪佩版築藏巖之逸去燥穀而
紆珩組異人俊乂旣間出而在官世鏡河仙亦離容而廊
廟蹇蹇同於多士諤諤比乎得人五典三墨旣葳蕤於壁
水九流入索亦繽紛於石渠畫一之政萬代表於時和三
章之律百姓沐於仁壽於是龍光之地日浴之鄉紫舌黃
支頭飛鼻飲自西自南無思不服欸關質子稱臣內向珠
樹素禽越火枝之地銀甕叩杖踰沉羽之渙出赤野而連
翩度元沙之泱泱於是嘉祥被衆瑞登金人澤馬丹旣玉
雞三角九尾四眉六足抽鋪地之九莖發端門之連理參
差於郊藪布濩於宮闕府無虛月史弗能記周稱黃鳥之
旗夏有元珪之錫無以踰此嘉祥方茲總萃道洽世昌國
殷民阜鄉知舜讓邑比堯封委粟栖畝神絲被澤可謂我

化若風民應如草我靜如鏡物動猶煙天子猶未明求衣
日昃不勸撤膳匪躬詢輿訪道鑾旗徐動棄千里而弗乘
寶瑟無虞捐百金而不取廣行四等被慈雨於枯根大闢
三明驚法雷於羣夢曲成萬物去殺愛生幽弊之民與蒼
雷而其悅否滯之義同谷風而開扞昆蟲得性跂蠢欣生
三驅有緩前之禽九門無餒獸之藥至德之事如此太平
之風如彼乃以恭肅神祇理通孝敬江左以來爽塏未闢
爰命將作揆日載營三靈叶響百工咸事宛如神造儼類
仙居沖秘隱嶙跨于畝於晉日閑曠麗遠吞七里於漢年
五達四通廓郊彌野南瞻重嶽北眺芒嶺東臨灞澹西望
舊豐紆餘委蛇上陵起伏澎湃幾兕山川異態飛梁邃宇
洞牖穴懸紫殿仙宮霞騫鳥翥霧映倒梁日光疎鉞玉桃
卷葉銀樹抽芳百果千株三珠八柱朝葉與密露其鮮晚

花與薰風俱落露禽乍聚望比翼之翱翔歸飛時宿聞同心之夜響故以熊熊灼灼炫兩明而仰七曜紛紛沐沐承五烟而帶三靈圖丘閒靜紫壇肅設五精之場千神之位八堦宏麗四維博敞宛若千仞狀懸流之仙館煥如五彩同瑤山之帝壇石牒神昌之瑞方臻金縷飛光之徵永固是雕是琢鄙茅茨之爲儉非珠非玉啗甘泉之已奢望昔方今獨高千古沿襲異等質文斯中於是歲在單閼星次訾陬律中太簇日惟辛卯將有事於南郊甸師清野封人壝宮朱幕夕峙帷宮宿設曉漢斜陰挈壺升漏天子御玉輅動金根入驥揚衡雙龍翼蓋雲罕徐迴鳴鐃韻響風承豹尾日映鷩冠萬騎天行千乘雷動石鐙犀衣之士連七萃而雲屯珠旗日羽之兵亘五管而星列鬱鬱阡阡震震填填充溢乎國都彌漫於鄜邑者也若乃廼興降蹕薦禮

帝儀揖太清秩羣望被大裘服山冕恭蒼璧之明祀穆靈
壇之禋敬黍稷非馨明德惟馨日曜彤精天澄翠色百僚
師師九官濟濟千神叶福萬億均慶六典斯備三禮必該
焚柴告成罔不欽若翠煙升錄同河濱之瑞雲丹燎燭天
若帝鄉之美氣雲門麗舞咸池廣樂已叶九韶之曲復諧
六列之奏金匏旣動望蛺蝶之遊龍玉磬徐鳴觀參差之
舞鳳珪轄駕肩士女填噎接袂爲幃連裾猶堵鼓腹擊轅
行歌舞扑然後紆玉輦而謝書生登靈臺而望雲物欽明
美化跨萬古於茲日廣運愉樂表千載於當今方當巡云
云之禮啓亭亭之業封天答睠禮地徵靈南山之壽無極
七百之基長固豈不懋哉豈不盛哉菲薄微臣謬與蒲服
馳心休禮秣馬之願無由徒罄褊辭清風之藻多愧敢敷
庸理獻頌十章其辭曰

元始道一渾德氛氲遙哉遠古負矣初分磅礴地載清朗

天文大人觀物生民樹君

其一

蛇軀龍準作樂垂衣皇圖炤

灼帝篆蕨蕨廓寥中代合聖與誰於燦我后命世天飛

其二

元默馭辯寂照秉真就雲握厯望日臨民謙光履德義禮

稱珍車書同軌天下歸仁

其三

期章孔備盛化宏道酌衢敬

賓欽賢愛老變正是珍燭車非寶如海之深如日之杲

其四

肅恭明神迅聽前踵配天道尊迎陽義重元酒陶匏燔柴

雲聳跨舜論韶籠堯稱拱

其五

赫矣郊宮載惟靜謐肅肅禁

闔陰陰仙室六戎列野八鸞照日架殿星羅重宮霧出

其六

蒲萄金橘靈壽木難素奈開暑貞擅陵寒山池壯麗階閭

彤丹葉垂疊雨花落重巒

其七

康哉盛德美矣世豐三辰炳

耀七政永隆五方來洎四隩茲通懸繩度竿駕鹿追風

其八

既敷懋化復覩瑞滋金車出野玉露霑墀紫概神草華平

瑞芝長愉汪濊永固雍熙其照天漏浹遠肅通睦惠靡齊
民恩彌比屋式光惇史踰斯郁郁皇哉康哉同茲景福其
梁簡文帝馬寶頌

皇帝應百姓之心副四海之願復履玉衡還臨億兆天地
交泰日月貞明至理惟新隆平方始遐邇壹體中外禔福
舍生欣欣若耘耰之逢夏雨懷情坎坎譬草木之值春風
帝王之道超邁開闢睿聖之功殫厯遠古軒羲不足鑿枘
堯舜不足憲章至哉大哉無得而稱也五月丁酉朔絲竹
會于德陽之堂于時日進內宮星次鶉首仲夏之晷稍極
陽城之圭綈賓之鍾初應潁川之律縉雲旦卷南風晚扇
惠氣入帷清陰周宇玉輿雲罕照日充庭羽林中權分階
列校簪笏成行貂纓在席昭天之樂金石鏗鏘報地之禮
威儀肅省詔以馬寶示羣臣太僕效官趣馬掌贊三令五

申丞聯事舉八麗四圉給役相趨暉煜金鑣陸離寶勒天
地無疆之德永星致遠之功鸞旂善鳴龍儀美稱沸教權
奇之威趨攄抑揚之態足轉驚電眼流含燭霧噴紛霏流
沫飄酒數千爲壽豈待原蠶之禁萬里一息不藉杜衡之
草王良不能控其衡策伯樂不能辨其文機方知總轡崑
岑周非吾馭張樂大野夏有慚德豈止沉河用壁獨有綠
文之稱盛德在木偏受蒼龍之名至於千將寶劍遙服晉
鄭之軍蓮花烏玉騰威大海之際況乎馬寶義實踰之方
當夙沙自歸滑橋屈膝欵關入塞偃武修文去病無出師
之勞充國罷議邊之略五律成珍九河如鏡臣謹按瑞應
經彌勒成佛經中阿含經覽愚經竝稱第三之馬者三千
歲華子云堯漢皆得馬者堯漢皆火德正斗南方乘德而
至也豈非聖德汪濊皇風洋溢研機洞元備禮達義是以

天不愛道白馬嘶風王澤效祥朱鬣降祉比夫圓蹄方足
躑躅在郊風嘯電奔聲遶處圀五彩依樹三雀登巢安髣
髴于當今弗擬議于休應百辟卿士咸稱萬歲伊臣不佞
結慶雲霄親承詔旨預觀寶瑞手舞足蹈贊揚不足宴禮
斯畢退而作頌其辭曰

帝廣通德欽明儀郊升道形聲德爲軌仁作經璇璣正太
階平割五禮和六英開四攝行八政轉輪皇飛行聖愍含
識資惠命引蒼生歸法性菩提眞般若淨七寶均萬邦寧
逖惇史觀陳詩域中大唯聖期間元妙復孝慈解流澤隨
因時刑已措績咸熙三農盛九穀滋萬祇悅入神怡律有
節應得天景星曜慶雲連珠爲月醴爲泉民何幸值皇年
乾道應坤馬來度玉闕升玉臺鏤錫煥鸞鑣迴槃雲轉堞
塵開千天駟百龍媒永伏阜掃駒駉秣瑤栗秀芳芻九夷

欵四表清毗霄樂與頌興

高伯恭北伐頌

格高而氣卑意厚而語薄時爲之也然以視齊梁繁響則此固爲雅奏

皇矣上帝降鑒惟德眷命有魏照臨萬國禮化丕融王猷允塞靜亂以威穆民以則北虜舊隸稟政在蕃往因時否逃命北轅世襲凶軌背忠食言招亡聚盜醜類實繁敢率犬羊圖縱倡蹶乃詔訓師興戈北伐躍馬裹糧星馳電發撲討虔劉肆陳斧鉞斧鉞暫陳馘翦厥旅積骸填谷流血成浦元兇狐奔假息窮野爪牙旣摧腹心亦阻周之忠厚存及行羣翼翼聖明有兼斯美澤被京觀垂此仁旨封尸塗獲惠加生死生受蒙惠人欣覆育理貫幽冥澤漸殊域物歸其誠神獻其福遐邇斯懷無思不服古稱善兵歷時

始捷今也用師辰不及浹六軍克合萬邦以協義著春秋
功銘玉牒載興頌聲播之來葉

許務本神雀頌

有序

臣聞觀象則天乾元合其德觀法審地域大表其尊雨施
雲行四時所以生殺川流岳立萬物於是裁成出震乘離
之君紀鳳司鳳之后玉璽玉斗而降金版金縢以傳並陶
冶性靈含煦動植眇元珠於赤水寂明鏡乎虛堂莫不景
福氤氲嘉脫離集馳聲南董越響雲韶粵我皇帝之君臨
闡大方抗太極負鳳邸據龍圖不言行焉滿提建指不肅
清焉喉鈴啓閉括地復夏截海剪商就望體其尊登咸昌
其會縣區浹宇遐至邇安騰實飛聲直暢傍施無體之禮
威儀布政之宮無聲之樂綴兆總章之觀上庠養老躬問
百年下土字民心爲百姓月棲日浴熱坂寒門吹鱗沒羽

之荒赤蛇青馬之裔解辦請吏削社承風豈止呼韓北場
頻勒狼居之岫息慎南境近表不耐之城故使天弗愛道
地寧吝寶川岳展異幽明効靈狎素游賴團膏激醴半景
青赤孳慙虧盈足足懷仁般般擾義祥祐之來若此升降
之化如彼而登封盛典云亭佇白檢之儀致治成功柴燎
靡元珪之告雖奉常定禮武騎草文天子抑而未行推而
不有允恭克讓其在斯乎七十二君信茂如也故神禽顯
賁元應恃昭白爵主鐵豸之奇赤爵銜丹書之貴班固神
爵之頌履武戴文曹植嘉爵之篇棲庭集牖未若于飛武
帳來賀文櫬刷采青蒲將翺赤劉玉几朝御取翫軒轅之
間金門旦開兼留翬翟之鑒終古曠世未或前聞福召冥
徵得之茲日歲次上章律諧大呂元枵會節元英統時至
尊未明求衣晨興於含章之殿爰有瑞爵翺翔而下載行

載止當展宇而徐前來集來儀承軒墀而顧步夫瑞者符也明主之休徵雀者爵也聖人之大寶謹案考異邳云軒轅有黃爵赤頭立日傍占云土精之應又禮稽命徵云祭祀合其宜則黃爵集晉漢集泰時之殿魏下文昌之宮一見雍邱之祠三入平東之府並旁觀迴矚事陋人微奚足稱矣抑又聞之不刳胎剖卵則鸞鳳馴鳴不漉浸焚原則螭龍盤蜿是知陛下止殺故飛走宅心皇慈好生而浮潛育德臣面奉綈綸垂示休祥預承嘉宴不勝藻躍李虔僻處西土陸機少長東隅微臣慚於往賢逢時盛乎曩代輒竭庸瑣敢獻頌云

太素式肇大德資生功元不器道要無名質文鼎革沿習因成祥圖瑞史赫赫明明天保大定於鏤我君武義乃武文教惟文橫塞宇宙旁凝射汾軒物重造姚風再薰煥發

王策昭彰帝道御地七神飛天五老山祇吐祕河靈孕寶
黑羽升壇青鱗伏阜丹鳥流火白雉從風棲阿德劭鳴岐
祚隆未如神爵近賀王宮五靈何有百福攸同孔圖獻赤
荀文表白節節奇音行行瑞跡化玉黼展銜環陞戟上天
之命明神所格綏應在旃伊臣預焉永緝韋素方流管絃
歌頌不足蹈舞無宣臣拜稽首億萬斯年

薛元卿隨高祖頌

有序

煬帝見而衛之以爲是魚藻之義然今尋其託諷之處
亦殊不可得

太始太素荒淫造化之初天皇地皇杳冥書契之外其道
絕其迹遠言談所不詣耳目所不追至于入穴登巢鶉居
穀飲不殊于羽族取類于毛羣亦何貴于人靈何用于心
識羲軒已降爰暨唐虞則乾象而施法度觀人文而化天

下然後帝王之位可重聖哲之道爲尊夏后殷周之國禹
湯文武之主功濟生民聲流雅頌然陵替於三五慚德於
干戈秦居閭位任刑名爲政本漢執靈圖維霸道而爲業
當塗興而三分峙典午末而四海亂九州封域窟穴鯨鯢
之羣五都遺黎蹴踏戎馬之足蹠元行定嵩洛水運據崤
函未止滄海之流詎息崑山之燎叶千齡之旦暮當萬葉
之一朝者其在大隋乎粵若高祖文皇帝誕聖降靈則赤
光照室韜神晦迹則紫氣騰天龍顏日角之奇玉理珠衡
之異著在圖籙彰乎儀表而帝系靈長神基崇峻類邠岐
之累德異豐沛之勃起俯膺厯試納揆賓門位長六卿望
高百辟猶重華之爲太尉若文命之任司空蒼厯將盡率
土麋沸玉弩驚天金鉞照野奸雄挺禍據河朔而連海岱
猾長縱惡杜白馬而塞成臯庸蜀逆命憑銅梁之險鄖黃

背誕引金陵之寇三川已震九鼎將飛高祖龍躍鳳翔濡
足援手應赤伏之符受元狐之籙命百戰百勝之將動九
天九地之師平其王而殄蚩尤翦狹獫而戮鑿齒不煩二
十八將無假五十二征曾未踰時妖逆咸殄廓氛霧于區
宇出黎元于塗炭天柱傾而還正地維絕而更紐殊方稽
顙識牛馬之內向樂師伏地懼鐘石之變聲萬姓所以樂
推三靈于是改卜壇場已備猶宏五讓之心億兆難違方
從四海之請光臨寶祚展禮郊丘舞六代而降天神陳四
圭而饗上帝乾坤交泰品物咸亨酌前王之令典改易徽
號因庶萌之子來移創都邑天文上當朱鳥地理下據黑
龍正位辨方揆景于日月內宮外座取法于辰象懸政教
于魏闕朝羣后于明堂除舊布新移風易俗天街之表地
脉之外獫狫孔熾其來自久橫行十萬樊噲于是失辭提

步五千李陵所以陷沒周齊兩盛競結旄頭娉狄后于漠
北未足息其侵擾傾珍藏于山東不能止其貪暴炎靈啟
祚聖皇馭寓運天策于帷扆播神威于沙朔柳室瓊裘之
長皆爲臣隸瀚海蹕林之地盡充池苑三吳百越九江五
湖地分南北天隔內外談黃旗紫蓋之氣恃龍蟠獸據之
嶮恒有僭僞之君妄竊帝王之號時經五代年移三百爰
降皇情永懷大道愍彼黎獻獨爲匪人今上利建在唐則
哲居代地憑宸極天縱神武受脤出車一舉平定于是八
荒無外九服大同四海爲家萬里爲宅乃休牛散馬偃武
修文自華夏亂離絳績年代人造戰爭之具家習澆僞之
風聖人之遺訓莫存先王之舊典咸墜爰命秩宗刊定五
禮申勅太史改正六樂玉帛罇俎之儀節文乃備金石匏
革之奏雅俗始分而留心政術垂神聽覽早朝晏罷廢寢

忘食憂百姓之未安懼一物之失所行先王之道夜思待旦革百王之弊朝不及夕見一善事喜彰于容旨聞一愆犯歎深于在予薄賦輕徭務農重穀倉廩有紅腐之積黎萌無阻飢之慮天性宏慈聖心惻隱恩加禽獸胎卵于是獲全仁霑草木牛羊所以勿踐至于憲章重典刑名大辟申法而屈情決斷于俄頃故能彝倫攸叙上下齊肅左右絕譖諛之路縉紳無勢力之門小心翼翼敬事于天地終日乾乾誠慎于亢極陶黎萌于德化致風俗于太康公卿庶尹遐邇岳牧僉以天平地成千載之嘉會登封降禪百王之盛典宜其金泥玉檢展禮介邱飛聲騰寶常爲稱首天子爲而不恃成而不居沖旨凝邈固辭弗許而雖休勿休上德不德更乃潔誠岱岳遜謝愆咎方知六十四卦謙撝之道爲尊七十二君告成之義爲小巍巍蕩蕩無得以

稱焉而深誠至德感達于穹壤和氣薰風充溢于宇宙二
儀降福百靈薦祉日月星象風雲草樹之祥山川玉石鱗
介羽毛之瑞歲見月彰不可勝紀至于振古所未有圖籍
所不載目所不見耳所未聞古語稱聖人作萬物觀神靈
滋百寶用此其效矣旣而遊心姑射脫屣之志已深鑄鼎
荆山升天之駕遂遠凡在黎獻其惟帝臣慕深考妣哀纏
弓劒塗山幽峻無復玉帛之禮長陵寂寞空見衣冠之遊
若乃降精燁怒飛名帝錄開運握圖創業垂統聖德也撥
亂反正濟國寧人六合八紘同文共軌神功也元酒陶匏
雲和孤竹禋祀上帝尊極配天大孝也偃伯戢戈正禮裁
樂納民壽域驅俗福林至政也張四維而臨萬寓侔三皇
而並五帝豈直錙銖周漢么魏晉而已雖五行之舞每
陳于清廟九德之歌無絕于樂府而元功暢洽不局于形

器懿業遠大豈盡于掄揚臣輕生多幸命偶興運趨事紫宸驅馳丹陛一辭天闕奄隔鼎湖空有攀龍之心徒懷蓐蟻之意庶憑毫翰敢希贊述昔堙海之禽不增于大地泣河之士非益于洪流盡其心之所存忘其力之所及輒緣斯義不覺楚然乃作頌曰

悠哉遠古邈矣季世四海九州萬王千帝三代之後其道逾替爰逮金行不勝其弊戎狄猾夏羣凶縱慝竊號淫名十有餘國怙威逞暴悖禮亂德五嶽塵飛三象霧塞元精啓歷發迹幽方并吞寇僞獨擅雄強載祀二百比祚前王江湖尙阻區域未康勾吳閩越河朔渭涘九縣瓜分三方鼎峙狙詐不息干戈競起東夏雖平亂離瘼矣五運叶期千年肇旦赫矣高祖人靈攸贊聖德迴生神謀獨斷瘳惡彰善夷凶靖難宗伯撰儀太史練日孤竹之管雲和之瑟

展禮上元飛烟太一珪璧朝會山川望秩占揆星景移建
邦畿下憑赤壤上叶紫微布政衢室懸法象魏帝宅天府
固本崇威句河瀚海龍荒狼望種落陸梁時犯亭障皇威
遠懾帝德遐暢稽顙歸誠稱臣內向吳越提封斗牛星象
積有年代自稱君長大風未繳長鯨漏網授鉞天人豁然
清蕩戴日戴斗太平太蒙禮教周被書軌大同復禹之跡
成舜之功禮以安上樂以移風憂勞庶績矜宥黔首三面
解羅萬方引咎納民軌物驅時仁壽神化隆平生靈熙阜
虔心恭已奉天祀地協氣橫流休徵紹至壇場望幸云亭
虛位推而不居聖道彌粹齊跡姬文登發嗣聖道類漢光
傳莊寶命知來藏往元覽幽鏡鼎業靈長洪基隆盛崆峒
問道汾射窅然御辯遐逝乘雲上仙哀纏率土痛感穹元
流澤萬葉用教百年尙想獻圖永惟聖則道洽幽顯仁霑

動植爻象不陳乾坤將息微臣作頌用申周極

合河蕭氏
羽粹家譜

駢體文鈔卷三

雜屬頌類

王子淵聖主得賢臣頌

此非頌體後人亦遂無效之者

夫荷旃被毳者難與道純繇之麗密羹藜哈糗者不足與論太牢之滋味今臣僻在西蜀生於窮巷之中長於蓬茨之下無有游觀廣覽之知顧有至愚極陋之累不足以塞厚望應明指雖然敢不略陳愚心而抒情素記曰其惟春秋法五始之要在乎審已正統而已夫賢者國家之器用也所任賢則趨舍省而功施普器用利則用力少而就効衆故工人之用鈍器也勞筋苦骨終日矻矻及至巧冶鑄于將之璞清水淬其鋒越砥歛其矜水斷蛟龍陸剽犀革忽若雪汜畫塗如此則使離婁督繩公輸削墨雖崇臺五增延袤百丈而不溷者工用相得也庸人之御驚馬亦傷

吻弊筴而不進於行胸喘膚汗人極馬倦及至駕齧膝駢
乘旦王良執靶韓哀附輿縱騁馳騫忽如景靡過都越國
蹶如厯塊追奔電逐遺風周流八極萬里一息何其遼哉
人馬相得也故服絺綌之涼者不苦盛暑之鬱燠襲狐貉
之煖者不憂至寒之淒愴何則有其具者易其備賢人君
子亦聖王之所以易海內也是以嘔喻受之開寬裕之路
以延天下之英俊也夫竭智附賢者必建仁策索人求士
者必樹伯迹昔周公躬吐捉之勞故有園空之隆齊桓設
庭燎之禮故有匡合之功由此觀之君人者勤於求賢而
逸於得人人臣亦然昔賢者之未遭遇也圖事悞策則君
不用其謀陳見惻誠則上不然其信進仕不得施効斥逐
又非其愆是故伊尹勤於鼎俎太公困於鼓刀百里自鬻
甯戚飯牛離此患也及其遇明君遭聖主也運籌合上意

諫諍卽見聽進退得關其忠任職得行其術去卑辱奧溲
而升本朝離疏釋譎而享膏粱剖符錫壤而光祖考傳之
子孫以資說士故世必有聖智之君而後有賢明之臣故
虎嘯而列風龍興而致雲蟋蟀族秋吟蜉蝣出以陰易曰
飛龍在天利見大人詩曰思皇多士生此王國故世平主
聖俊父將自至若堯舜禹湯文武之君獲稷契皋陶伊尹
呂望之臣明明在朝穆穆布列聚精會神相得益章雖伯牙操
遞鐘蓬門子轡烏號猶未足以喻其意也故聖主必待賢
臣而宏功業俊士亦俟明主以顯其德上下俱欲懽然交
欣千載壹合論說無疑翼乎如鴻毛遇順風沛乎如巨魚
縱大壑其得意如此則胡禁不止曷令不行化溢四表橫
被無窮遐夷貢獻萬祥畢臻是以聖主不徧窺望而視已
明不單頃耳而聽已聰恩從祥風翺德與和氣游太平之

責塞優游之望得導游自然之勢恬沒無爲之場休徵白
至壽考無疆雍容垂拱永永萬年何必偃仰詘信若彭祖
呶噓呼吸如喬松眇然絕俗離世哉詩曰濟濟多士文王
以寧蓋信乎其以寧也

司馬長卿封禪文

以允荅兢業立意故極波涌雲亂之觀而仍字字有歸
宿此意揚班已不能窺況其下乎

伊上古之初肇自吳穹今生民厯撰列辟以迄於秦率邇
者踵武逖聽者風聲紛紛葳蕤湮滅而不稱者不可勝數
也繼昭夏崇號謚略可道者七十有二君罔若淑而不昌
疇逆失而能存軒轅之前遐哉邈乎其詳不可得聞已五
三六經載籍之傳維見可觀也書曰元首明哉股肱良哉
因斯以談君莫盛於唐堯臣莫賢於后稷后稷創業於唐

公劉發跡於西戎文王改制爰周至隆大行越成而後陵
遲衰微千載亡聲豈不善始善終哉然無異端愼所由於
前謹遺教於後耳故軌迹夷易遵也湛恩濛涌易豐也
憲度著明易則也垂統理順易繼也是以業隆於襁褓而
崇冠於二后揆厥所元終都攸卒未有殊尤絕迹可考於
今者也然猶躡梁父登泰山建顯號施尊名大漢之德漢
商原泉沕滴漫羨旁魄四塞雲尊霧散上暢九垓下沂八
埏懷生之類霑濡浸潤協氣橫流武節飄逝邇陝遊原遐
闊泳沫首惡湮沒闇昧昭晷昆蟲凱澤回首面內然後圉
騶虞之珍羣微麋鹿之怪獸藥一莖六穗於庖犧雙觥共
牴之獸獲周餘珍收龜於岐招翠黃乘龍於沼鬼神接靈
囿賓於閭館奇物譎詭倣儻窮變欽哉符瑞臻茲猶以爲
薄不敢道封禪蓋周躍魚隕杭休之以燎微夫斯之爲符

也以登介邱不亦慝乎進讓之道何其爽歟於是大司馬
進曰陛下仁育羣生義征不憚諸夏樂貢百蠻執贄德侔
往初功無與二休烈浹洽符瑞衆變期應紹至不特創見
意泰山梁甫設壇場望幸蓋號以况榮上帝垂恩儲社將
以薦成陛下謙讓而弗發也挈三神之驪缺王道之儀羣
臣慝焉或謂且天爲質闇珍符固不可辭若然辭之是泰
山靡記而梁父靡幾也亦各並時而榮咸濟世而屈說者
尙何稱於後而云七十二君乎夫修德以錫符奉命以行
事不爲進越故聖王不替而修禮地祇謁款天神勒功中
嶽以章至尊舒盛德發榮號受厚福以浸黎民也皇皇哉
斯事天下之壯觀王者之丕業不可貶也願陛下全之而
後因雜薦紳先生之略術使獲耀日月之末光絕爰以展
案錯事猶兼正列其義校飭厥文作春秋一藝將襲舊六

爲七攄之無窮俾萬世得激清流揚微波蜚英聲騰茂實
前聖之所以永保鴻名而常爲稱首者用此宜命掌故悉
奏其義而覽焉於是天子沛然改容曰愉乎朕其試哉乃
遷思同慮總公卿之議詢封禪之事詩大澤之博廣符瑞
之富遂作頌曰自我天覆雲之油油甘露時雨厥壤可游
滋液滲漉何生不育嘉穀六穗我穡曷蓄非唯雨之又潤
澤之非唯濡之汜尊濩之萬物熙熙懷而慕思名山顯位
望君之來君乎君乎侯不邁哉般般之歡樂我君固白質
黑章其儀可嘉旼旼睦睦君子之能蓋聞其聲今觀其來
厥塗靡蹤天瑞之徵茲亦於舜虞氏以興濯濯之麟游彼
靈時孟冬十月君徂郊祀馳我君與帝以享社三代之前
蓋未嘗有宛宛黃龍興德而升采色炫燿熿炳輝煌正陽
顯見覺悟黎烝於傳載之云受命所乘厥之有章不必諄

諄依類託寓喻以封巒披藝觀之天人之際已交上下相發允答聖王之德兢兢翼翼也故曰興必慮衰安必思危是以湯武至尊嚴不失肅祇舜在假典顧省厥遺此之謂也

楊子雲劇秦美新

誣善之人其詞游失其守者其辭屈此文之謂也然古藻駿邁之氣則與長卿並驅矣

諸吏中散大夫臣雄稽首再拜上封事皇帝陛下臣雄經術淺薄行能無異數蒙渥恩拔擢倫比與羣賢並愧無以稱職臣伏惟陛下以至聖之德龍興登庸欽明尚古作民父母爲天下主執粹精之道鏡照四海聽聆風俗博覽廣包參天貳地兼並神明配五帝冠三王開闢以來未之聞也臣誠樂昭著新德光之罔極往時司馬相如作封禪一

篇以彰漢氏之休臣嘗有顛眴病恐一旦先大馬填溝壑
所懷不章長恨黃泉敢竭肝膽寫腹心作劇秦美新一篇
雖未究萬分之一亦臣之極思也臣雄稽首再拜以聞曰
權輿天地未祚睢睢盱盱或元而萌或黃而芽元黃剖判
上下相嘔爰初生民帝王始存在乎混混茫茫之時豐聞
罕漫而不昭察世莫得而云也厥有云者上罔顯於羲皇
中莫盛於唐虞邇靡著於成周仲尼不遭用春秋因斯發
言神明所祚兆民所託罔不云道德仁義禮智獨秦崛起
西戎邠荒岐雍之疆因襄文宣靈之僭跡立基孝公茂惠
文奮昭莊至政破縱擅衡并吞六國遂稱乎始皇盛從鞅
儀韋斯之邪政馳驚起翦恬賁之用兵剗滅古文刮語燒
書弛禮崩樂塗民耳目遂欲流唐漂虞滌殷蕩周難除仲
尼之篇籍自勒功業改制度軌量咸稽之於秦紀是以耆

儒碩老抱其書而遠遜禮官博士卷其舌而不設來儀之
鳥肉角之獸狙獼而不臻甘露嘉醴景曜浸潭之瑞潛大
弗經賈巨狄鬼信之妖發神歇靈繹海水羣飛二世而亡
何其劇與帝王之道兢兢乎不可離已夫能貞而明之者
窮祥瑞回而昧之者極妖愆上覽古在昔有憑應而尙缺
焉壞徹而能全故若古者稱堯舜威侮者陷桀紂况盡泯
掃前聖數千載功業專用已之私而能享祜者哉會漢祖
龍騰豐沛奮迅宛葉自武關與項羽戮力咸陽創業蜀漢
發跡三秦克項山東而帝天下擣秦政慘酷尤煩者應時
而蠲如儒林刑辟厯紀圖典之用稍增焉秦餘制度項氏
爵號雖違古而猶襲之是以帝典闕而不補王綱弛而未
張道極數殫闇忽不還逮至大新受命上帝還資后土顧
懷元符靈契黃瑞涌出渾渟沕滴川流海渟雲動風偃霧

集雨散誕彌八圻上陳天庭震聲日景爰光飛響盈塞天
淵之間必有不可辭讓云爾於是乃奉若天命窮寵極崇
與天剖神符地合靈契創億兆規萬世奇偉倜儻譎詭天
祭地事其異物殊怪存乎五威將帥班乎天下者四十有
八章登假皇穹鋪衍下土非新室其疇離之卓哉煌煌真
天子之表也若夫白鳩丹鳥素魚斷蛇方斯蔑矣受命甚
易格來甚勤昔帝纘皇王纘帝隨前踵古或無爲而治或
損益而亡豈知新室委心積意儲思垂務旁作穆穆明日
不寐勤勤懇懇者非秦之爲與夫不勤勤則前人不當不
懇懇則覺德不愷是以發秘府覽書林遙集乎文雅之圃
翺翔乎禮樂之場允殷周之失業紹唐虞之絕風懿律嘉
量金科玉條神卦靈兆古文畢發炳煥照耀靡不宣臻式
幹軒旂旗以示之揚和鸞肆夏以節之施黼黻袞冕以昭

之正嫁娶送終以尊之親九族淑賢以穆之夫改定神祇
上儀也欽修百祀咸秩也明堂雍臺壯觀也九廟長壽極
孝也制成六經洪業也北懷單于廣德也若復五爵度三
壤經井田免人役方甫刑匡馬法恢崇祇庸燦德懿和之
風廣披摺紳講習言諫箴誦之塗振鷺之聲充庭鴻鸞之
黨漸階俾前聖之緒布濩流行而不韞韜郁郁乎煥哉天
人之事盛矣鬼神之望允塞羣公先正罔不夷儀姦宄寇
賊罔不振威紹少典之苗著黃虞之裔帝典闕者已補王
綱弛者已張炳炳麟麟豈不懿哉厥被風濡化者京師沈
潛甸內匝洽侯衛厲揭要荒濯沐而衛前典巡四民迄四
嶽增封泰山禪梁父斯受命者之典業也蓋受命日不暇
給或不受命然猶有事矣况堂堂有新正丁厥時崇嶽渟
海通瀆之神咸設壇塲望受命之臻焉海外遐方信延頸

企踵回面內嚮喁喁如也帝者雖勤惡可以已乎宜命賢
哲作帝典一篇舊三爲一襲以示來人摛之罔極令萬世
常戴巍巍履栗栗臭馨香含甘實鏡純粹之至精聆清和
之正聲則百工伊凝庶績咸喜荷天衢提地釐斯天下之
上則已庶可試哉

班孟堅典引

裁密思靡遂爲駢體科律 語無歸宿閱之覺茫無畔
岸此其所以不逮卿雲

臣固言永平十七年臣與賈逵傅毅杜矩展隆郗萌等召
詣雲龍門小黃門趙宣持秦始皇帝本紀問臣等曰太史
遷下贊語中寧有非邪臣對此贊賈誼過秦篇云向使子
嬰有庸主之才僅得中佐秦之社稷未易絕也此言非是
卽召臣入問本闡此論非邪將見問意開寤耶臣具對素

聞知狀詔因曰司馬遷著書成一家之言揚名後世至以身陷刑之故反微文刺譏貶損當世非誼士也司馬相如洿行無節但有浮華之辭不周於用至於疾病而遺忠主上求取其書竟得頌述功德言封禪事忠臣效也至是賢遷遠矣臣固常伏刻誦聖論昭明好惡不遺微細緣事斷誼動有規矩雖仲尼之因史見意亦無以加臣固被學最舊受恩浸深誠思畢力竭情昊天罔極臣固頓首伏惟相如封禪靡而不典楊雄美新典而亡實然皆游揚後世垂爲舊式臣固才朽不及前人蓋詠雲門者難爲音觀隨和者難爲珍不勝區區竊作典引一篇雖不足雍容明盛萬分之一猶啓發憤懣覺悟童蒙光揚大漢軼聲前代然後退入溝壑死而不朽臣固愚戇頓首頓首曰

太極之元兩儀始分烟烟熅熅有沈而奧有浮而清沈浮

交錯庶類混成肇命民主五德初起同於草昧元混之中
踰繩越契寂寥而亡詔者系不得而綴也厥有氏號紹天
闡繹莫不開元於太昊皇初之首上哉夏乎其書猶得而
修也亞斯之代通變神化函光而未曜若夫上稽乾則降
承龍翼而炳諸典謨以冠德卓絕者莫崇乎陶唐陶唐舍
允而禪有虞有虞亦命夏后稷契熙載越成湯武股肱旣
周天迺歸功元首將授漢劉俾其承三季之荒末值亢龍
之災孽懸象闔而恒文垂彛倫敦而舊章缺故先命元聖
使綴學立制宏亮洪業表相祖宗贊揚迪哲備哉粲爛眞
神明之式也雖皇夔衡旦密勿之輔比茲褊矣是以高光
二聖宸居其域時至氣動乃龍見淵躍拊翼而未舉則威
靈紛紜海內雲蒸雷動電燦胡繼莽分尚不蒞其誅然後
欽若上下恭揖羣后正位度宗有于德不台淵穆之讓靡

號師矢敦奮撓之容蓋以膺當天之正統受克讓之歸運
蓄爰上之烈精蘊孔佐之宏陳云爾洋洋乎若德帝者之
上儀誥誓所不及已鋪觀二代洪纖之度其蹟可探也並
開迹於一簣同受侯甸之服奕世勤民以方伯統牧乘其
命賜彤弧黃鉞之威用討韋顧黎崇之不恪至於參五華
夏京遷縞毫遂自北面虎螭其師革滅天邑是故誼士華
而不敦武稱未盡護有慙德不其然與亦猶於穆猗那翕
純皦繹以崇嚴祖考殷薦宗配帝發祥流慶對越天地者
曷奕乎千載豈不克自神明哉誕畧有常審言行於編籍
光藻朗而不渝耳矧夫赫赫聖漢巍巍唐基沂測其源乃
先孕虞育夏甄殷陶周然後宣二祖之重光襲四宗之緝
熙神靈日照光被六幽仁風翔乎海表威靈行乎鬼區匿
亡回而不氓微胡瑱而不頤故夫顯定三才昭登之績匪

堯不興鋪闡遺策在下之訓匪漢不宏厥道至於經緯乾坤出入三光外運渾元內霑豪芒性類循理品物咸亨其已久矣盛哉皇家帝世德臣列辟功君百王榮鏡宇宙尊亡與亢乃始虔輦勞謙兢兢業業貶成抑定不敢論制作至於遷正黜色賓監之事渙揚寓內而禮官儒林屯用篤誨之士不傳祖宗之髣髴雖云優慎無乃蕙與於是三事岳牧之寡僉爾而進曰陛下仰監唐典中述祖則俯蹈宗軌躬奉天經惇睦辨章之化治巡靖黎蒸懷保鰥寡之惠浹燔瘝縣沈肅祇羣神之禮備是以來儀集羽族於觀魏肉角馴毛宗於外囿擾緇文皓質於郊升黃輝采鱗於沼甘露宵零於豐草三足軒翥於茂樹若乃嘉穀靈草奇獸神禽應圖合謀窮祥極瑞者朝夕坰牧日月邦畿卓犖乎方州洋溢乎要荒背姬有素雉朱鳥元秬黃蓂之事耳君

臣動色左右相趨濟濟翼翼戢戢如也蓋用昭明寅畏承
 聿懷之福亦以寵靈文武貽燕後昆覆以懿鑠豈其爲身
 而有顯辭也若然受之亦宜勤恁旅力以充厥道啓恭館
 之金縢御東序之秘寶以流其占夫圖書亮章天哲也孔
 繇先命聖孚也體行德本正性也逢吉丁辰景命也順命
 以創制固定以和神答三靈之蕃祉展放唐之明文茲事
 體大而允寤寐次於聖心瞻前顧後豈蔑清廟憚敕天命
 也伊考自遂古乃降戾爰茲作者七十有四人有不俾而
 假素罔光度而遺章今其如台而獨闕也是時聖上固以
 垂精遊神包舉藝文屢訪羣儒俞咨故老與之斟酌道德
 之淵源肴覈仁誼之林藪以望元符之臻焉旣感羣后之
 讜辭又悉經五絲之碩慮矣將緝萬嗣揚洪輝奮景爰扇
 遺風播芳烈久而愈新用而不竭汪汪乎丕天之大律其

疇能亘之哉唐哉皇哉皇哉唐哉

張平子東巡詔

非完篇然典則可法

惟二月初吉帝將狩於岱嶽展義省方觀民設教丙寅胝率羣賓備法駕以祖于東門屆於靈宮是日也有雙鳳集於臺壬辰祀上帝於明堂帝曰咨予不材爲天地主慄慄翹翹百僚萬幾心之謂矣孰朕之勞上帝有靈不替朕命誕敢不祇承凡庶與祭於壇墠之位者曰懷爾邦君實愿先帝載厥大宗以左右朕躬羣臣曰帝道橫被旁行海表一人有韙萬民賴之從巡助祭者茲惟嘉瑞乃歌曰皇皇者鳳通元知時萃於山趾與帝邀期吉事有祥惟漢之祺帝曰朕不敢當亦不敢蔽天之吉命

邯鄲子禮魏受命述

馬三
氣甚靡尙不失爲雅音

臣聞雅頌作於盛德典謨興於茂功德盛功茂傳序不忘是故竹帛以載之金石以聲之垂諸來世萬載彌光陛下以聖德應期龍飛在位其有天下也恭己以受天子之籍無爲而四海順風若乃天地顯應休徵祥瑞以表聖德者不可勝載鑠乎煥顯眞神明之所以祚命世之令主也凡自能言之類莫不謳嘆於野執筆之徒咸竭文思獻詩上頌臣抱疾伏蓐作書一篇欲謂之頌則不能雍容盛懿列仲元妙欲謂之賦又不能敷演洪烈光揚緝熙故思竭愚稱受命述曰伊上天闡載自民主肇建厯聽風聲陶唐爲盛虞夏受終殷周革命有禪而帝有代而王禪代雖殊大小繇同於是以漢厯在魏赤運歸黃也是故大魏之業皇耀震霆肅清宇內萬邦有截帥義翼漢奉禮不越旅力戮

心茂亮洪烈樹深根以厚基播醇澤以釀味含光而弗輝
戢翼而弗發將俟聖嗣是遂是達聖嗣承統爰宣重光陳
錫裕下民悅無疆三神宣釐四靈順方元龜介玉應龍粹
黃若云魏德據茲以昌爾乃鳴玉陟壇三措以俟旣受休
命龍旋鳳峙煌煌厥耀穆穆容止臨下有赫允也天子旣
受帝位納璽要紱太常司燎升炮告類瑤璋峨峨髦士棣
棣蹕蹕聖躬御策以蒞巍巍乎崇功顯顯乎德容信帝位
之壯業天休之所鍾也于時天地交和日月光精氣稔不
作風塵弭清凡在壇場之位舉目乎廣庭莫不君臣和德
咸玉色而金聲屢省萬幾謀訪老成治詠儒墨策納公卿
昧旦孜孜夕惕乾乾務在諧萬國敘彝倫而折不若懷遠
人混六合之風納乎仁壽之門刑錯靡試偃伯靡軍然後
乃勒功岱嶽升中上元斯固我皇之大摹思心之所存也

司馬長卿難蜀父老

意雖寓規實則頌也解此措語之法乃能氣壯情駭
四子講德論倣之必俗此文倣之必駭世然必解此然
後文有生氣藻麗絕特尤擷香拾豔之淵藪也

漢興七十有八載德茂存乎六世威武紛紜湛恩汪濊羣
生澍濡洋溢乎方外於是乃命使西征隨流而襲風之所
被罔不披靡因朝冉從驪定笮存邛略斯榆舉苞蒲結軌
還轅東鄉將報至於蜀都耆老大夫縉紳先生之徒二十
有七人儼然造焉辭畢因進曰蓋聞天子之於夷狄也其
義羈縻勿絕而已今罷三郡之士通夜郎之塗三年於茲
而功不竟士卒勞倦萬民不贍今又接之以西夷百姓力
屈恐不能卒業此亦使者之累也竊爲左右患之且夫邛
笮西僰之與中國竝也歷年茲多不可記已仁者不以德

來彊者不以力并意者其殆不可乎今割齊民以附夷狄
敝所恃以事無用鄙人固陋不識所謂使者曰烏謂此乎
必若所云則是蜀不變服而巴不化俗也僕尙惡聞若說
然斯事體大固非觀者之所覲也余之行急其詳不可得
聞已請爲大夫粗陳其略蓋世必有非常之人然後有非
常之事有非常之事然後有非常之功夫非常者固常人
史記無人之所異也故曰非常之原黎民懼焉及臻厥成
字疑脫天下晏如也昔者鴻水淳出汎濫衍溢民人登降移徙陟
陞而不安夏后氏戚之乃堙鴻決流疏河漣沈澹菑東歸
之於海而天下永寧當斯之勤豈惟民哉心煩於慮而身
親其勞躬胝無腋膚不生毛故休烈顯乎無窮聲稱浹乎
于茲且夫賢君之踐位也豈特委瑣握鐫拘文牽俗循誦
習傳當世取說云爾哉必將崇論閎議創業垂統爲萬世

規故馳驚乎兼容并包而勤思乎參天貳地且詩不云乎
普天之下莫匪王土率土之賓莫匪王臣是以六合之內
八方之外浸溥衍溢懷生之物有不浸潤於澤者賢君恥
之今封疆之內冠帶之倫咸獲嘉祉靡有闕遺矣而夷狄
殊俗之國遼絕異黨之地舟車不通人迹罕至政教未加
流風猶微內之則犯義侵禮於邊境外之則邪行橫作放
弑其上君臣易位尊卑失序父老不辜幼孤爲奴係纍號
泣內嚮而怨曰蓋聞中國有至仁焉德洋而恩普物靡不
得其所今獨曷爲遺已舉踵思慕若枯旱之望雨鰥夫爲
之垂涕況乎上聖又焉能已故北出師以討彊胡南馳使
以誨勁越四面風德二方之君鱗集仰流願得受號者以
億計故乃關沫若徼牂牁鏤靈山梁孫原創道德之塗垂
仁義之統將博恩廣施遠撫長駕使疏逖不閉阻深閭昧

得耀乎光明以偃甲兵於此而息誅伐於彼遐邇一體中外視福不亦康乎夫拯民於沈溺奉至尊之休德反衰世之陵遲繼周氏之絕業斯乃天子之急務也百姓雖勞又惡可以已哉且夫王事固未有不始於憂勤而終於佚樂者也然則受命之符合在於此矣方將增泰山之封加梁父之事鳴和鸞揚樂頌上咸五下登三觀者未覩旨聽者未聞音猶鷗明已翔乎寥廓而羅者猶視乎藪澤悲夫於是諸大夫芒然喪其所懷來而失厥所以進喟然竝稱曰允哉漢德此鄙人之所願聞也百姓雖怠請以身先之敞罔靡徙因遷延而辭退

王子淵四子講德論

張宛鄰云往時讀此文病其氣靡辭冗今再讀之始知其氣之淳厚辭之腴暢從容雅頌令人漸漬其中而不

能自己

微斯文學問於虛儀夫子曰蓋聞國有道貧且賤焉恥也
今夫子閉門距躍專精趨學有日矣幸遭聖主平世而久
懷寶是伯牙去鍾期而舜禹遁帝堯也於是欲顯名號建
功業不亦難乎夫子曰然有是言也夫蚊蟲終日經營不
能越階序附驥尾則涉千里攀鴻翮則翔四海僕雖頑嚚
願從足下雖然何由而自達哉文學曰陳懿誠於本朝之
上行話談於公卿之門夫子曰無介紹之道安從行乎公
卿文學曰何爲其然也昔甯戚商歌以干齊桓越石負芻
而寤晏嬰非有積素索舊之歡皆塗觀卒遇而以爲親者
也故毛嬙西施善毀者不能蔽其好嫫媧倭傀善譽者不
能掩其醜苟有至道何必介紹夫子曰谷夫特達而相知
者千載之一遇也招賢而處友者衆士之常路也是以空

柯無刃公輪不能以斲但懸曼增蒲苴不能以射故鷹騰
撇波而濟水不如乘舟之逸也衝蒙涉田而能致遠未若
遵塗之疾也才蔽於無人行衰於寡黨此古今之患唯文
學慮之文學曰唯唯敬聞命矣於是相與結侶攜手俱游
求賢索友歷於西州有二人焉乘輅而歌倚輓而聽之詠
歎中雅轉運中律曄緩舒繹曲折不失節問歌者爲誰則
所謂浮游先生陳邱子者也於是以士相見之禮友焉禮
文旣集文學夫子降席而稱曰俚人不識寡見尠聞襲從
末路望聽玉音竊動心焉敢問所歌何詩請聞其說浮游
先生陳邱子曰所謂中和樂職宣布之詩益州刺史之所
作也刺史見太上聖明股肱竭力德澤洪茂黎庶和睦天
人竝應屢降瑞福故作三篇之詩以歌之也文學曰君子
動作有應從容得度南容三復白圭孔子睹其慎戒太子

擊誦晨風文侯諭其指意今吾子何樂此詩而詠之也先生曰夫樂者感人密深而風移俗易吾所以詠歌之者美其君術明而臣道得也君者中心臣者外體外體作然後知心之好惡臣下動然後知君之節趨好惡不形則是非不分節趨不立則功名不宣故美玉蘊於砥砭凡人視之快焉良工砥之然後知其和寶也精練藏於鑛朴庸人視之忽焉巧冶鑄之然後知其幹也況乎聖德巍巍蕩蕩民氓所不能命哉是以刺史推而詠之揚君德美深乎洋洋罔不覆載紛紜天地寂寥宇宙明君之惠顯忠臣之節究皇唐之世何以加茲是以每歌之不知老之將至也文學曰書云迪一人使四方若卜筮夫忠賢之臣導主志承君惠摠盛德而化洪天下安瀾比屋可封何必歌詠詩賦可以揚君哉愚竊感焉浮游先生色勃皆溢曰是何言與昔

周公詠文王之德而作清廟建爲頌首吉甫歎宣王穆如清風列于大雅夫世衰道微僞臣虛稱者殆也世平道明臣子不宜者鄙也鄙殆之繫傷乎王道故自刺史之來也宣布詔書勞來不怠令百姓徧曉聖德莫不霑濡麗膺耆考之老咸愛惜朝夕愿濟須臾觀大化之淳流於是皇澤豐沛主恩滿溢百姓歡欣中和感發是以作歌而詠之也傳曰詩人感而後思思而後積積而後滿滿而後作言之不足故嗟歎之嗟歎之不足故詠歌之詠歌之不厭不知手之舞之足之蹈之也此臣子於君父之常義古今一也今子執分寸而罔億度處把握而却寥廓乃欲圖大人之樞機道方伯之失得不亦遠乎陳邱子見先生言切恐二客慙膝步而前曰先生詳之行潦暴集江海不以爲多鱣鱣竝逃九鼓不以爲虛是以許由匿堯而深隱唐氏不以

衰夷齊恥周而遠餓文武不以卑夫青蠅不能穢垂棘邪
 論不能惑孔墨今刺史質敏以流惠舒化以揚名采詩以
 顯至德歌詠以董其文受命如絲明之如縉甘棠之風可
 倚而俟也二客雖室計沮議何傷顧謂文學夫子曰先生
 微矜於設道又不讓乎當仁亦未巨過也愿二子措意焉
 夫子曰否夫雷霆必發而潛底震動枹鼓鏗鏘而介士奮
 竦故物不震不發士不激不勇今文學之言欲以議愚感
 敵舒先生之憤願二生亦勿疑也於是文繹復集乃始講
 德文學夫子曰昔成康之世君之德歟臣之力也先生曰
 非有聖智之君惡有甘棠之臣故虎嘯而風寥戾龍起而
 致雲氣蟋蟀俟秋吟蜉蝣出以陰易曰飛龍在天利見大
 人鳴聲相應伏偶相從人由意合物以類同是以聖主不
 徧窺望而視以明不殫傾耳而聽以聰何則淑人君子人

就者衆也故千金之裘非一狐之腋大廈之材非一邱之木太平之功非一人之畧也蓋君爲元首臣爲股肱明其一體相待而成有君而無臣春秋刺焉三代以上皆有師傅五伯以下各自取友齊桓有管鮑隰寧九合諸侯一匡天下晉文有咎犯趙衰取威定霸以尊天子秦穆有王由五羖攘却西戎始開帝緒楚莊有孫叔子反兼定江淮威震諸夏句踐有種蠡泄庸剋滅彊吳雪會稽之恥魏文有段干田翟秦人寢兵折衝萬里燕昭有郭隗樂毅夷破彊齊困閔於莒夫以諸侯之細功名猶尙若此而况帝王選於四海羽翼百姓哉故有賢聖之君必有明智之臣欲以積德則天下不足平也欲以立威則百蠻不足攘也今聖主冠道德履純仁被六藝佩禮文屢下明詔舉賢良求術士招異倫拔駿茂是以海內歡慕莫不風馳雨集龔雜竝

至填庭溢闕含淳詠德之聲盈耳登降揖讓之禮極目進
者樂其條暢怠者欲罷不能偃息乎詩書之門遊觀乎道
德之域咸潔身修德吐情素而披心腹各悉精銳以貢忠
誠允愿推主上宏風俗而騁太平濟濟乎多士文王所以
寧也若乃美政所施洪恩所潤不可究陳舉孝以篤行崇
能以招賢去煩蠲苛以綏百姓祿勤增俸以厲貞廉減膳
食卑宮觀省田官損諸苑疎繇役振乏困恤民災害不遑
遊宴閔耄老之逢辜憐綴經之服事惻隱身死之腐人悽
愴子弟之縲監恩及飛鳥惠加走獸胎卵得以成育草木
遂其零茂愷悌君子民之父母豈不然哉先生獨不聞秦
之時耶違三王背五帝滅詩書壞禮義信任羣小憎惡仁
智詐僞者進達佞諂者容入宰相刻峭大理峻法處位而
任政者皆短於仁義長於酷虐狼犖虎攫懷殘秉賊其所

臨泣莫不肌慄懼伏吹毛求疵竝施螫毒百姓征徭無所
措其手足嗷嗷愁怨遂亡秦族是以養雞者不畜狸牧獸
者不育豺樹木者憂其蠹保民者除其賊故大漢之爲政
也崇簡易尙寬柔進淳仁舉賢才上下無怨民用和睦今
海內樂業朝廷淑清天符旣章人瑞又明品物咸亨山川
降靈神光耀暉洪洞朗天鳳皇來儀翼翼邕邕羣鳥竝從
舞德垂容神雀仍集麒麟白至甘露滋液嘉禾櫛比大化
隆洽男女條暢家給年豐咸則三壤豈不盛哉昔文王應
九尾狐而東夷歸周武王獲白魚而諸侯同辭周公受秬
鬯而鬼方臣宣王得白狼而夷狄賓夫名自正而事自定
也今南郡獲白虎示偃武興文之應也獲之者張武武張
而猛服也是以北狄賓洽邊不恤寇甲士寢而旌旗仆也
文學夫子曰天符旣聞命矣敢問人瑞先生曰夫匈奴者

百蠻之最彊者也天性嬌蹇習俗桀暴賤老貴壯氣力相
高業在功伐事在獵射兒能騎羊走箭飛鏃逐水隨畜都
無常處鳥集獸散往來馳騫周流曠野以濟嗜欲其耒耜
則弓矢鞍馬播種則扞弦掌耜收秋則奔狐馳兔穫刈則
顛倒殪仆追之則奔遁釋之則爲寇是以三王不能懷五
伯不能綏驚邊抗士屢犯芻蕘詩人所歌自古患之今聖
德隆盛威靈外覆日逐舉國而歸德單于稱臣而朝賀乾
坤之所開陰陽之所接編結沮顏焦黼臬臠剪髮黥首文
身裸袒之國靡不奔走貢獻懽忻來附婆娑嘔吟鼓掖而
笑夫鴻均之世何物不樂飛鳥翕翼淵魚奮躍是以刺史
感邁舒音而詠至德鄙人黠淺不能究識敬遵所聞未克
殫焉於是二客醉于仁義飽于盛德終日仰歎怡懌而悅
服

終軍白麟奇木對

此下諸篇爲後來卽事應制所昉皆頌揚多於述事

臣聞詩頌君德樂舞后功異經而同指明盛德之所隆也南越竄屏葭葦與鳥魚羣正朔不及其俗有司臨境而東甌內附閩王伏辜南越賴救北胡隨畜薦居禽獸行虎狼心上古未能攝大將軍秉鉞單于犇幕票騎抗旌昆邪右衽是澤南洽而威北暢也若爵不阿近舉不遺遠設官俟賢縣賞待功能者進以保祿罷者退而勞力刑於宇內矣履衆美而不足懷聖明而不專建三宮之文質章厥職之所宜封禪之君無聞焉夫天命初定萬事草創及臻六合同風九州共貫必待明聖潤色祖業傳於無窮故周至成王然後制定而休徵之應見陛下盛日月之光垂聖思之勒成專神明之敬奉燔瘞於郊宮獻享之精交神積和之

氣塞明而異獸來獲宜矣昔武王中流未濟白魚入於王舟俯取以燎羣公咸曰休哉今郊祀未見於神祇而獲獸以饋此天之所以示饗而上通之符合也宜因昭時令日改定告元苴以白茅於江淮發嘉號於營邱以應緝熙使著事者有紀焉蓋六鵠退飛逆也白魚登舟順也夫明闇之徵上亂飛鳥下動淵魚各以類推今野獸并角明同本也衆枝內附示無外也若此之應殆將有解編髮削左衽襲冠帶要衣裳而蒙化者焉斯拱而俟之耳

顏延年三月三日曲水詩序

隸事之富始于士衡織詞之縟始于延之詞事並繁極于徐庾而皆骨足以載之初唐諸作則惟恐肉之不勝也

大方策既載皇王之迹已殊鐘石畢陳舞詠之情不一雖

淵流遂往詳略異聞然其宅天衷立民極莫不崇尚其道
神明其位拓世貽統固萬葉而爲量者也有崇面夏帝圖
宏遠高祖以聖武定鼎規同造物皇上睿文承厯景屬宸
居隆周之卜旣永宗漢之兆在焉正體毓德於少陽王宰
宣哲於元輔晷緯昭應山瀆效靈五方雜遝四隩來暨選
賢建戚則擇之於茂典施命發號必酌之於故實大子協
樂上庠肆教章程明密品式周備國容祇令而動軍政象
物而具箴闕記言校文講義之官采遺於內輜車朱軒懷
荒振遠之使諭德於外蘋莖素纓并柯共穗之瑞史不絕
書棧山航海踰沙軼漠之貢府無虛月烈燧千城通驛萬
里穹居之君內首稟朔卉服之首回面受吏是以異人慕
嚮俊民間出警蹕清夷表裏悅穆將徙縣中宇張樂岱郊
增類帝之宮飾禮神之館塗歌邑頌以望屬車之塵者久

矣日躔胃維月軌青陸皇祗發生之始后王布和之辰思
對上靈之心以惠庶萌之願加以二王于邁出餞戒告有
詔掌故爰命思厯獻洛飲之禮具上巳之儀南除輦道北
清禁林左闕巖墜右梁潮源略亭臯跨芝廕苑太液懷曾
山松石峻境葱翠陰煙游泳之所攢萃翔驟之所往還於
是離宮設衛別殿周徼旌門洞立延帷接榼閬水環階引
池分席春宮聯事蒼靈奉塗然後昇祕駕允緹騎搖玉鑾
發流吹天動神移淵旋雲被以降于行所禮也旣而帝暉
臨幄百司定列鳳蓋俄軫虹旗委旆肴蔌芬藉觴醪泛浮
妍歌妙舞之容銜組樹羽之器三奏四上之調六莖九成
之曲競氣繁聲合變爭節龍文飾繼青翰侍御華裔殷至
觀聽驚集揚袂風山舉袖陰澤靚莊藻野袷服縟川故以
殷賑外區煥衍都內者矣上膺萬壽下禔百福布筵稟和

闔堂依德情盤景遽歡洽日斜金駕總駟聖儀載佇悵鈞
臺之未臨慨艷宮之不縣方且排鳳閣以高遊開爵園而
廣晏竝命在位展詩發志則夫誦美有章陳信無愧者歟
王元長三月三日曲水詩序

臣聞出豫爲象鈞天之樂張焉時乘旣位御氣之駕翔焉
是以得一奉宸逍遙襄城之域體元則大悵望姑射之阿
然宵眇寂寥其獨適者矣至如夏后兩龍載驅璿臺之上
穆滿八駿如舞瑤水之陰亦有饗云固不與萬民共也我
大齊之握機創厯誕命建家接禮貳宮考庸太室幽明獻
期雷風通饗昭華之珍旣徙延喜之玉攸歸革宋受天保
生萬國度邑靜鹿邱之歎遷鼎息大垠之慙紹清和於帝
猷聯顯懿於王表駿發開其遠祥定爾固其洪業皇帝體
膺上聖運鍾下武冠五行之秀氣邁三代之英風昭章雲

漢暉麗日月牢籠天地彈壓山川設神理以景俗敷文化
以柔遠澤普汜而無私法含宏而不殺猶且具明廢寢是
晷亡餐念負重於春冰懷御奔於秋駕可謂巍巍弗與蕩
蕩誰名秉靈圖而非泰涉孟門其何峻儲后睿哲在躬妙
善居質內積和順外發英華斧藻至德琢磨令範言炳丹
竒道潤金璧出龍樓而問豎入虎闕而齒胄愛敬盡於一
人光耀究於四海若夫族茂麟趾宗固磐石跨躡昌姬韜
軌交漢元宰比肩於尙父中鉉繼踵乎周南分陝流勿剪
之歡來仕允克施之譽莫不如圭如璋令聞令望朱弗斯
皇室家君王者也本枝之盛如此稽古之政如彼用能免
羣生於湯火納百姓於休和草萊樂業守屏稱事引鏡皆
明目臨池無洗耳沈寘之怨旣缺適軸之疾已消興廉舉
孝歲時於外府署行議年日夕于中甸協律總章之司序

倫正俗崇文成均之職導德齊禮絜壺宣夜辨氣朔於靈
臺書笏珥彤紀言事於仙室褰帷斷裳危冠空履之吏影
搖武猛扛鼎揭旗之士勤恤民隱糾逖王慝射集隼於高
墉繳大風於長隧不仁者遠惟道斯行讒莠茂聞攘爭掩
息稀鳴桴於砥路鞠茂草於圓扉耆年闕市井之游穉齒
豐車馬之好宮鄰昭泰荒憬清夷侮食來王左言入侍離
身反踵之君鬢首貫胸之長屈膝厥角請受纓縻文鉞碧
帑之琛奇幹善芳之賦紈牛露犬之玩乘黃茲白之駟盈
衍儲邸充仞郊虞國牘相尋鞬譯無曠一尉候於西東台
車書於南北暢轂埋麟麟之轍綏旌卷悠悠之旆四方無
拂五戎不距偃草辭軒銷金罷刃天瑞降地符升澤馬來
器車出紫脫華朱英秀佞枝植厯草滋雲潤星暉風揚月
至江海呈象龜龍載文方握河沈璧封山紀石邁三五而

不追踐八九之遙迹功旣成矣世旣貞矣信可以優游暇
豫作樂崇德者歟於時青鳥司開條風發歲粵上斯已惟
暮之春同律克和樹草自樂襍飲之日在茲風舞之情咸
蕩去肅表平時訓行慶動於天囑載懷平圃乃睠芳林芳
林園者福地粵區之湊丹陵若水之舊殷殷均乎姚澤
撫向於周原狹豐邑之未宏陋譙居之猶褊求中和而經
處揆景緯以裁基飛觀神行虛檐雲構離房乍設層樓間
起負朝陽而抗殿跨靈沼而浮榮鏡文虹於綺疏浸蘭泉
於玉砌幽幽叢薄秩秩斯干曲拂邇迴潺湲徑復新萍泛
沚華桐發岫雜天采於柔荑亂嚶聲於絲羽禁軒承幸清
宮俟宴緹帷宿置帟幕宵懸旣而滅宿澄霞登光辨色式
道執殳展軫效駕徐鑾警節明鐘暢音七萃連鑣九旂齊
軌建旗拂霓揚葭振木魚甲煙聚貝冑星羅重英曲瑤之

飾絕景遺風之騎昭灼甄部駟駿函列虎視龍超雷駭電
逝轟轟隱隱紛紛軫軫羌難得而稱計爾乃迴輿駐罕嶽
鎮淵停晬容有穆賓儀式序授几肆筵因流波而成次蕙
肴芳醴任激水而推移葆佾陳階金匏在席戚奏翹舞籥
動邠詩召鳴鳥于弇州追伶倫於嶰谷發參差於王子傳
妙靡於帝江正歌有關羽觴無算上陳景福之賜下獻南
山之壽言凱讌之在藻知和樂於食苹桑榆之陰不居草
露之滋方渥有詔曰今日嘉會咸可賦詩凡四十有五人
其辭云爾

沈休文梁武帝集序

屬詞有體隱侯文之謹嚴者

文思安安欽明所以光宅日月光華南風所以興詠日角
之王出自諸生銳頂之君少明古學漢高宋武雖闕章句

歌大風以還沛好清設於暮年夫成天德之大功膺樂推之寶運未或不文武兼資能事斯畢者也我皇誕縱自天生知在御清明內發疏通外典爰始貴遊篤志經術究渾中之雅音盡曲臺之奧義莫不因流極源援條振藻若前疑往滯舊學罕通而超然直詣妙擅終古善發談端精於持論置壘難踰摧鋒莫擬有同成誦無假含毫興絕節於高唱振清辭於蘭畹至於春風秋月送別望歸皇王高宴心期促賞莫不超挺睿興濬發神衷及登庸厯試辭翰繁蔚牋記風動表議雲飛雕蟲小藝無累大道懷君人之大德有事君之小心爲下奉上形於辭旨雖密奏忠規遺藁必削而國謨藩政存者猶多逮乎俯應歸運仰修乾錄載筆握簡各有司存如綸之旨時或染翰暨於設虞靈囿愷樂在鎬鹿鳴四牡皇華棠棣之歌伐木采薇出車杖杜之

燕皆詠志摘藻廣命羣臣上與日月爭光下與鍾石比韻
事同觀海義等窺天觀之而不測遊之而不知者矣竊惟
左史記言右史記事君舉必書無論大小况乎感而後思
思而後積積而後滿滿而後言若斯而已哉謹因事立名
隨源編次

梁元帝職貢圖序

詞足盡意不強爲閑肆故佳

竊聞職方氏掌天下之圖四夷八蠻七閩九貉其所由來
久矣漢氏以來南羌旅距西域憑陵創金城開玉關絕夜
郎計日逐觀犀甲則建朱崖聞蒲萄則通大宛以德懷遠
異乎是哉皇帝君臨天下之四十載垂衣裳而賴兆民生
巖廊而彰萬國梯山航海交臂屈膝占雲望日重譯至焉
自塞以西萬八千里路之狹者尺有六寸高山尋雲深谷

絕景雪無冬夏與白雲而共色冰無早晚與素石而俱貞
踰空桑而歷昆吾度青邱而跨丹穴炎風弱水不革其心
身熱頭痛不改其節故以明珠翠羽之珍細而弗有龍文
汗血之驥卻而不乘尼邱乃聖猶有圖人之法晉帝君臨
實聞樂賢之象甘泉寫關氏之形後官玩單于之圖臣以
不佞推轂上游夷歌成章胡人遙集款開蹶角沿汭荆門
瞻其容貌訴其風俗如有來朝京輦不涉漢南別加訪採
以廣聞見名爲貢職圖云爾

李公輔霸朝集序

氣頗壯

竊以陽烏垂曜微藿傾心神龍騰舉飛雲觸石聖人在上
幽顯冥符故稱比屋可封萬物斯覩臣皇基草創便豫驅
馳遂得叅可封之民爲萬物之一其爲嘉慶固以多也若

夫帝臣王佐應運挺生接踵於朝諒有之矣而班爾之妙曲木變容朱藍所染素絲改色二十二臣功成盡美二十八將効力於時種德積善豈皆比於稷契計功稱伐非悉類於耿賈書契已還立言立事質非殆庶何世無之蓋上稟睿后旁資羣傑牧商鄙賤屠釣幽微化爲侯王皆由此也有教無類童子羞於霸功見德思齊狂夫成於聖業治世多士亦因此焉烟霧可依騰蛇與蛟龍俱遠栖息有所蒼蠅同騏驎之速因人成事其功不難自此而設雖非上智事受命之主委質爲臣遇高世之才連官接席皆可以翊亮天地名流鐘鼎何必蒼頡造書伊尹制命公旦操筆老聃爲史方可敘帝王之事談人鬼之謀乎至若臣者本慙實實非勲非德廁軒冕之流無學無才處藝文之職若不逢休運非遇天恩光大含宏博約文禮萬官百辟才悉

兼人收拙里閭退仕鄉邑不種東陵之瓜豈過南陽之掾
安得出入閭闔之間趨走太微之庭履天子之階侍聖皇
之側樞機帷幄雷及榮寵者也昔歲木行將季諒闇在辰
火運肇興羣官總已有周典八柄之所大隋納百揆之日
兩朝文翰臣兼掌之時溥天之下三方構亂軍國多務朝
夕填委簿領紛紜羽書交錯或速均發弩或事大滔天或
日有萬幾或幾有萬事皇帝內明外順經營區宇吐無窮
之術運不測之神幽贊兩儀財成萬類咨謀臺閣曉諭公
卿訓率土之濱賁反常之賊三軍奉律戰勝攻取之方萬
國承風安上治民之道讓受終之禮報羣臣之口有憲章
古昔者矣有隨事作故者矣千變萬化譬彼懸河寸陰尺
日不棄光景大則天壤不遺小則毫毛無失遠尋三古未
聞者盡聞述聽百王未見者皆見發言吐論卽成文章臣

梁翰操牘書記而已昔放勛之化老人覩而未知孔子之言弟子聞而不達愚情稟聖必多乖舛加以奏闕趨墀盈懷滿袖手披目閱堆案積几心無別慮筆不躓停或畢景忘餐或連宵不寐以勤補拙不遑自處其有詞理疎謬遺漏闕疑皆天旨訓誘神筆改定通籌建策通幽達冥從命者獲安違命者悉禍懸測萬里指期來事常如目見固乃神知變大亂而致太平易可誅而爲淳粹化成道治其在人文盡出聖懷用成典誥並非臣意所能至此伯禹矢謨成湯陳誓漢光數行之札魏武接要之書濟時拯物無以加也屬神器大寶將遷明德天道人心同謨歸往周靜南面每詔褒揚在位諸公各陳本志璽書表奏羣情賜委臣褻海之內忝曰一民樂趨之懷切於黎獻欣然從命輒不敢辭比夫潘勗之冊魏史闕三字之勸晉后道高前世才謝往

人內手捫心夙夜慙惕闕史書露板及以諸人有臣所作之
有臣潤色之唯是愚闕史所奏定者雖詞乖黼藻而理歸霸
德文有可忽事不可遺前奉敕旨集納麓以還至於受命
文筆當時制述條目甚多今日收撰畧爲五卷云爾

合河蕭氏
刻梓家訓